



*Noé sort de l'Arche avec sa famille, les eaux du Deluge s'estans retirées.*

**L**E Seigneur Dieu ayant souvenance de Noé, & de tous les animaux qui estoient dedans l'Arche, fist passer vn vent sur la terre, & les eaux se diminuerent : Aussi les fontaines & abysmes furent resserrées, & la pluye fut retenuë du Ciel : Et les eaux allans & venans se retirèrent de la terre en cent cinquante iours, & enfin s'abbaisserent au vingt-septiesme iour du septiesme mois. Adonc s'arresta l'Arche sur le mont d'Armenie. Les eaux s'estans écoulées, Noé ouurit la fenestre de l'Arche, & enuoya vn Corbeau qui vola çà & là, iusques à ce que les eaux fussent seiches. Noé aussi mit hors vne Colombe, qui ne trouuant où mettre son pied, retourna à l'Arche, & Noé estendant sa main la reprit ; puis sept iours apres, la mit encore dehors, laquelle retourna ayant au bec vne feüille d'oliue. Ce qui assoura Noé que la terre estoit deseichée : Et fut occasion que Noé ostant la couerture de l'Arche, regarda la terre seiche. Puis Dieu parla à Noé, disant : Sors hors del'Arche, ta femme & ta famille, fais aussi sortir tous les animaux qui sont avec toy, afin qu'ils multiplient sur la terre. Ce que Noé obserua, & vid lors si grande quantité de morts, qu'il eut iuste occasion de rendre graces à Dieu, pour auoir esté preseruë de grace speciale entre tant de peuples.

*Genese 8. Chap.*